



**Nastavljena istraga u vezi s nabavkom spornih respiratora u Federaciji BiH**

# SIPA pretresla i Zolakov službeni automobil

**U svakom slučaju stojimo na raspolaganju svima i otvoreni smo za saradnju, rekao Zolak**


**Uroš VUKIĆ**  
urosv@nezavisne.com

**BANJALUKA - Inspektori Državne agencije za istrage i zaštitu (SIPA) pretresli su sjedište Agencije za lijekove i me-**

dicinska sredstva BiH (ALMBiH) i izuzeli veću količinu dokumentacije u vezi s aferom "Respiratori" i firmom "Srebrena malina", koja je u jeku pandemije uvezla sporne respiratore u Federaciju BiH.

Osim prostorija, pretresen je i službeni automobil Aleksandra Zolaka, direktora Agencije za lijekove i medicinska sredstva, a pored njega, nekoliko sati ispitivani su i još neki zaposleni u ovoj agenciji.

Zolak je, napuštajući zgradu Agencije za lijekove i medicinska sredstva, samo kratko rekao da



**Inspektori SIPA kod Zolakovog službenog auta**  
FOTO VSTOJAKOVIĆ

su se inspektori interesovali za slučaj "Srebrena malina".

Inače, u trenutku dolaska inspektora SIPA Zolak nije bio u zgradi Agencije, ali je došao nakon telefonskog poziva jednog od inspektora.

Ulazeći u zgradu Agencije u kojoj su inspektori nekoliko časova "češljali" poslovnu dokumentaciju, Zolak je rekao da može samo da pretpostavi o čemu se radi.

"U svakom slučaju stojimo na raspolaganju svima i otvoreni smo za saradnju", rekao je Zolak, koji je još ranije ispitivan u prostorijama Tužilaštva BiH.

Inspektori SIPA dokumentaciju su izuzimali po nalogu Tužilaštva BiH, gdje juče nismo

**ZOLAK U AGENCIJU STIGAO NA POZIV INSPEKTORA SIPA**



Aleksandar Zolak

uspjeli dobiti više informacija, a ni u SIPA nisu bili rječitiji i samo su rekli da preduzimaju mjere i radnje iz svoje nadležnosti na području Barjaluke s ciljem pronalazjenja dokaza o počinjenju krivičnih djela.

Inače, kada je riječ o aferi "Respiratori", SIPA i Tužilaštvo BiH duže od mjesec dana intenzivno ispituju ovaj slučaj težak 10,5 miliona KM.

Sporne respiratore u BiH je iz Kine uvezla "Srebrena malina", koja je vlasništvo Fikreta Hodžića. U ovoj aferi privodeni su i osumnjičeni Fadil Novalić, premijer Federacije BiH, Fahrudin Solak, direktor Federalne uprave civilne zaštite, te sam

Hodžić. Sva trojica su puštena da se brane sa slobode i pored toga što je Tužilaštvo BiH tražilo privor.

Između ostalog, u ovoj aferi sporna je bila i sama dozvola Agencije za lijekove i medicinska sredstva firmi "Srebrena malina", koja nije bila registrovana za promet lijekova i medicinske opreme. Navodno, ta firma dozvolu za promet medicinskom opremom dobila je 26. aprila s rokom važenja na pet godina. Još ranije Zolak je rekao da iz ugla Agencije za lijekove i medicinska sredstva BiH u nabavci respiratora preko firme "Srebrena malina" nema ništa sporno, ističući da je od početka marta do kraja aprila oko 60 pravnih lica u BiH podnijelo zahtjev za izdavanje saglasnosti za uvoz interventnih medicinskih sredstava, a da tih 60 firmi nije registrovano za uvoz i da su kao i "Srebrena malina" dobili rješenja isti dan ili sutradan.

Kada je riječ o spornim respiratorima, nalazi stručnih vještaka koje je angažovalo Tužilaštvo BiH pokazali su da su oni praktično neupotrebljivi. "Nabavljeni respiratori ne posjeduju ni minimum potrebnih bitnih karakteristika za adekvatan tretman pacijenata u jedinicama intenzivne terapije, među koje spadaju pacijenti oboljeli od kovida-19", navedeno je u izvještaju stručnog vještaka, a čije mišljenje je početkom maja prenijelo Tužilaštvo BiH.

**INSPEKTORI NEKOLIKO ČASOVA "ČEŠLJALI" DOKUMENTACIJU**